

續名醫類案

第三十一

S28

1815

1731

錢塘魏之琇編集

僕院呂大綱慎會
海昌王士雄孟英

同校

癰疽

李東垣治通父家翟梗于尻醫上足太陽經生癰堅硬腫痛

大作左右尺脈俱緊按之無力羌活黃柏各二錢防風藁

本連翹各一錢肉桂七分甘草蒼朮陳皮各五分當歸一

錢黃耆一錢五分酒二大盞水一大盞煎至一盞去渣空

心熱服以夾被蓋覆其癰使藥行罷去之一服愈

子族叔父平生多慮。質弱神勞。年近五十。忽右膊外側廉上
生結核。身微寒熱。而易怒。食味頗厚。脈之俱弦大浮數。而
重按似澁。曰此多慮而憂傷血。時在初秋。勿輕視之。宜急
補以防變症。以人參一斤作膏。下以竹瀝。病者吝費。招一
外科以十宣五香散。閒與服。旬日後。一日大風拔木。病者
發熱。神思不佳。急召視之。核稍高大。似有膿于中。起一紅
線。延過肩後。斜走繞背脊。過入右脇下。不痛。覺肩背重而
急迫。食有嘔意。脈同前。但弦多耳。作人參膏。合芎朮。生薑
汁飲之。用人參三斤。瘡潰膿乾。又與四物湯。加參朮陳皮
甘草半夏。生薑百餘帖而安。此等若在春令。雖神仙不治。

也幸而在秋金之令不幸因時下暴風激起木中相火而致此自非參膏驟補何由得免

朱朗年四十餘惡寒發熱右腿內廉厥陰分生一腫毒此是冷折熱在肺經血分與此方。蔓仁黃藥子赤芍歸頭條芩各三錢青皮角刺桂枝各二錢甘草節一錢分四帖煎服一盞入忍冬藤汁二蛤殼食前飲以忍冬藤渣敷腫上。

呂孺人惡寒發熱腹上有小疽此血少有熱與此方。白木川芎各三錢赤芍連翹各二錢半防風陳皮黃芩各二錢木通錢半甘草五分分五帖煎服

鄭經歷性嗜酒與煎燂年五十餘忽春末夏初患額絲竹空

涌出一角長短大小如雞距稍堅求治曰此非膏梁所致而何宜斷厚味先解食毒針灸以開泄壅滯未易治也此少陽經所過氣多血少者鄭以憚煩召他醫以大黃朴硝腦子等涼藥罨之一夕豁開如醬蚘徑三寸一二日後血自蚘中濺出高數尺而死此涼藥外逼熱鬱不得發宜其發之暴如此也

陳自明外科精要云神仙截法治癰疽發背一切惡症預服則毒氣不入內真麻油一斤銀石器內熬十數沸候冷用酒兩椀入油五盞通口熱服一日用盡緩則數日服之吳安世云吾家三世用之無有不驗又云獵者云凡中藥齏前

急飲麻油藥毒卽消鄭學諭德甫屢用之甚驗

薛立齋治一男子患癰腫硬疼痛發熱煩躁飲冷脈沈實大便祕乃邪在臟也用內疏黃連湯疏通之以絕其源先投一劑候行一次勢退一二再進一劑諸症悉退乃用黃連消毒散四劑而消

一男子患癰膿熟不潰欲針之補以托裏不信乃服攻毒藥及致惡心少食始悟而用針更以六君子湯加藿香當歸四劑少可再加以加味十全大補湯數劑而斂凡瘡膿熟不行針刺膿毒侵蝕輕者難療重者不治老弱之人或偏僻之處及緊要之所若一有膿宜急針之更以托裏庶幾無

變

一男子患癰作痛服寒涼藥痛雖止而食愈少瘡亦不潰以六君子湯而食進再以托裏藥潰之而愈大抵瘡疽之症寒熱虛實皆能作痛熱毒之痛者以寒涼之劑折之寒邪之痛者以溫熱之劑散之因風而痛者除其風因溼而痛者導其溼燥而痛者潤之塞而痛者通之虛而痛者補之實而痛者瀉之膿鬱而閉者開之惡肉侵蝕者去之陰陽不和者調之經絡閉澁者利之慎勿概用寒涼之藥况血脈喜溫而惡寒若冷氣入裏血卽凝滯反爲難瘥矣

馮楚瞻治趙翁年七十二右頰腫硬連及顛項耳後一片堅

實不熱不痛已兩月餘諸治不效漸至口內出膿牙際不
開飲食少進精神日衰脈則洪大而空知爲元氣大虧陰
寒所聚所謂石疽是也不得陽和何以外解若內潰日久
穿喉破頰不可療矣乃用豬脂搗爛入肉桂細末葱頭食
鹽杵勻厚敷患處敷藥以脂膏治血肉同氣相應也葱能
透竅鹽能軟堅桂能行血油能浸潤皮膚內則空心生脈
飲送八味丸食遠志麥著歸芩苓朮薄桂銀花角刺之類
使陽回則陰寒自解血氣沖和自能逐毒三五日後冰硬
者熱軟漫腫者高聳木者疼痛紫者紅活飲食日進血氣
漸長毒既外出久凝久瘀之血肉消者消膿者膿不再旬

而愈。

張景岳治一儒者年近三旬素病聾耳發必潰膿至是益甚自耳根下連頸項上連頭角耳前後莫不腫痛或與散風降火一月後稠膿鮮血自耳迭出每二三日必出鍾許而腫痛全不消枕不可近察其形色已大不足而腫痛則若有餘脈之或急或緩弱此非實熱可知遂先與六味湯二三劑元氣稍振繼與一陰煎加牛蒡伏苓澤瀉倍加白茯苓爲君服五十餘劑外用降癰散晝夜敷治兩月而後愈蓋此症雖似潰瘍有餘而實以肝腎不足上實下虛一奇

症也

何奇之有

張通府耳後髮際患腫一塊無頭肉色不變按之微痛彼以爲痰結核其脈軟而時見數經云脈數不時見則生瘡也非痰結仲景云微弱之脈主血氣俱虛形精不足又云沈遲軟弱皆宜托裏遂以人參白朮黃耆當歸川芎炙草以託裏少加金銀花白芷桔梗以消毒彼謂不然內飲降火化痰外帖涼藥覺寒徹腦患處大熱頭愈重飲食愈少復請治以四君子湯加藿香炮干薑數劑飲食漸進膿成刺之更以十全大補湯去桂及炙草貼以豆豉餅又月餘而愈

胡生耳後寸餘發一毒名曰銳疽焮痛發熱煩躁喜冷此膽

經蘊熱而發先用神仙活命飲一劑勢減二三時值仲冬彼惑於藥有用寒遠寒之禁故不再服自用十宣散託裏之藥勢漸熾耳內膿潰復請治視其喉腫閉藥不能下而歿

一婦人年逾四十近環跳穴生一毒尺脈沈緊腿不能伸經曰脾寒移于肝癰腫筋攣夫脾主肉肝主筋肉溫則筋舒肉冷則筋急遂與乳香定痛丸治之少愈更以助胃壯氣血藥二十餘劑而消

一婦人倏傷次指成膿不潰焮痛至手誤敷涼藥以致通焮微嘔少食彼以爲毒氣內攻診其脈沈細此痛傷胃氣而

然也遂刺之服六君子湯加藿香當歸食進更服八珍湯
加黃耆白芷桔梗月餘而愈又一後生亦患此色黑不痛
其指已死欲令斬去速服補劑恐黑上臂不治彼不信另
服敗毒藥手竟黑遂不可救又一男子亦傷拇指色紫不
痛服託裏藥及灸五十餘壯作痛潰膿而愈又吳舉人幼
女因凍傷兩足至春發潰指俱壞遂去之服以大補藥而
愈又藍上舍女患嵌甲傷指年餘不愈日出膿數滴謂足
大指乃肝脾二經發源之所宜灸患處使瘀血去陽氣至
瘡口自合否則不治彼忽之不早治後變勞症而歿蓋至
陰之下血氣難到若女人患此又多因扎縛致血脈不通

或被風邪所襲。則無氣血榮養。遂成死肉。惟當壯其脾胃。行其經絡。生其血氣。則愈。其有成破傷風。以致牙關緊急。口眼喎邪者。先以玉真散一二服。然後投以通經生血之劑。

于御郎骸胛患毒痛甚。服消毒藥。其勢未減。卽以槐花酒一服。勢隨大退。再以託裏消毒之藥而愈。

立齋曰。予丙子年。忽惡心。大椎骨甚痒。須臾臂不能舉。神思甚倦。此天疽危病也。急隔蒜灸之。痒甚愈。又明灸五十餘壯。痒遂止。旬日而愈。精要云。灸法有回生之功。信矣。大凡蒸灸若未潰。則拔引鬱毒。已潰。則接補陽氣。祛散寒邪。瘡

口自合其功甚大。其法用大獨蒜切片如三錢厚貼疽頂上以艾炷安蒜片上灸之。每三壯一易蒜。若灸時作痛要灸至不痛不痛要灸至痛方止。大概以百壯爲度。膿潰則以神異膏貼之不日而安。一能使瘡不開大二內肉不壞三瘡口易合見效甚神。丹溪云惟頭爲諸陽所聚艾壯宜小而宜少。

王大廣年逾六十素厚味頰頰患毒未潰而肉先死脈數無力胃經積毒所致致頰頰正屬胃經未潰肉死則胃氣虛極老人豈宜患此辭不治果歿內經云膏粱之變足生大疔受如持虛。

黃履素曰子座師茅五芝先生長公子子京偶于腎間患一
毒地非要害直易視之子京素知醫恐痛傷元氣輒服人
參其毒愈甚發寒熱乃始延醫又遇粗工瀆後胸懣應服
參者又不能多服竟致不能收口而歿蓋癰疽初起先宜
瀉毒而後議補若補之太早遂有此禍可鑒也

邱汝誠面生疽卽買藥舖肆所合神芎散九予之曰以此療
之其人怒不肯服歸而告人人曰未必非良法也服之卽

瘥蓋其人嗜酒此丸實去酒病云

揮塵
新談

彭羨門少宰傳治腫毒初起方用雞子用銀簪插一孔用明
透雄黃二錢研極細未入之仍以簪攪極勻封孔入飯內

蒸熟食之日三枚神效

居易錄

前宦都令李聘說麥粉不拘多少用陳醋熬膏貼無名腫毒

神效

雄按此名烏龍膏麥粉乃洗麩造麵筋澄下之粉也

徐靈胎曰瘍科之法全在外治其手法必有傳授凡辨形察色以知吉凶及先後施治皆有成法必讀書臨症二者皆到然後無誤其升降圍點去腐生肌呼膿止血膏塗洗熨等方皆必純正和平屢試屢驗者乃能應手而愈至於內服之方護心託毒化膿長肉亦有真傳非尋常經方所能奏效也惟煎方則必視其人之強弱陰陽而為加減此則必通於內科之理全在學問根柢然又與內科不同蓋煎

方之道相同。而其藥則有某毒主某藥。某症主某方。非此不效。亦另有傳授焉。故外科總以傳授爲主。徒恃學問之宏博無益也。有傳授則較之內科爲尤易。惟外科而兼內科之症。或其人本有宿疾。或患外證之時。復感他氣。或因外症重極。內傷臟腑。則不得不兼內科之法治之。此必平日講於內科之道。而通其理。然後能兩全而無失。若不能治其內症。則并外症亦不可救。此則全在學問深博矣。若爲外科者。不能兼。則另請明理內科。爲之定方。而爲外科者。參議於其間。使其藥與外證無害。而後斟酌施治。則庶幾兩有所益。若其所現內症。本因外證而生。如痛極而昏。

暈膿欲成而生寒熱毒內陷而脹滿此則內症皆由外症而生只治其外症而內症已愈此又不必商之內科也但其道甚微其方甚眾亦非淺學者所能知也故外科之道淺言之則惟記煎方數首合膏圍藥幾料已可以自名家若深言之則經絡臟腑氣血骨脈之理乃奇病怪疾千態萬狀無不盡識其方亦無病不全其珍奇貴重難得之藥亦無所不備雖遇極奇極險之症亦了然無疑此則較之內科爲更難故外科之等級高下懸殊而人之能識其高下者亦不易也。

曰外科之法最重外治而外治之中尤重圍藥凡毒之所最

忌者散大而頂不高。蓋人之一身。豈能無七情六慾之伏。火風寒暑溼之留邪。飲食痰涎之積毒。身無所病。皆散處。退藏。氣血一聚而成癰腫。則諸邪四面皆會。惟圍藥能截之。使之併合。則周身之火毒不至矣。其已聚之毒不能透。出皮膚勢必四布爲害。惟圍藥能束之。使不散漫。則氣聚而外洩矣。如此則形小頂高。易膿易潰矣。故外治中之圍藥較之他藥爲特重。不但初起爲然。卽成膿收口。始終賴之一日不可缺。若世醫之圍藥不過三黃散之類。每試不效。所以皆云圍藥無用。如有旣破之後。而仍用圍藥者。則羣然笑之。故極輕之毒。往往至於散越。而不可收拾者。皆

不用圍藥之故。至於圍藥之方，亦甚廣博。大段以消痰拔毒，束肌收火為主。而寒熱攻提和平，猛厲則當隨症去取。世人不深求至理，而反輕議圍藥之非，安望其術之能工也。

神授衛生湯治一切瘡症，能宣熱散風，行瘀活血，解毒消腫。

疏通臟腑。徐靈胎曰：其法不外此四句。藥性和平，功效甚速。誠外科首

用方也。羌活八分，搜風發表。勝溼防風，勝溼解表。去風白芷發表散風，熱活血排膿。穿山甲土炒研，沈香紅花散結消腫。排膿瘡家聖藥。連翹石決明煨各六分。金銀花皂角刺歸尾甘草節生肌止痛。花粉太寒不可用。破後口渴者

可用以上各一錢乳香五分大黃酒浸炒一錢。脈虛便利者勿用水二碗煎八分病在上部先服藥。隨飲酒一杯病在下部先飲酒一杯。隨後服藥。以行藥勢。徐靈胎曰其方之分量亦最宜斟酌得中除大黃共一兩零五分此外科之主方加減不外乎。此又曰外科與內科大不相同內科之病千頭萬緒一病必有一病之主方外科不過託毒清火及生肌長肉等數法耳。卽有加減亦惟隨症選擇。幾味無多法也。學者果能將藥性細細參考自能隨症施治投無不利。

繆仲淳治疔疽及一切腫毒方生甘菊連根打碎一兩五錢

紫花地丁五錢甘草用水炙三錢鼠粘子炒研一錢五分
括蕞根二錢貝母三錢金銀花五錢白芷一錢五分生地
三錢白芨三錢連翹二錢五分五爪龍卽茜草五錢先用
夏枯草六兩河水六碗煎三大碗去渣入煎藥一碗不拘
時服潰後加鹽水炒黃芪五錢麥冬五錢

又圍陰症瘡瘍方紅藥子四兩白芨一兩五錢白蘇一兩五
錢乳香六錢沒藥六錢硃砂三錢雄黃三錢麝香一錢冰
片一錢黑狗下頰一個煨存性豌豆粉一兩各另研極細
末和勻以醋蜜調敷四圍以極滾熱醋蘸潤亦可服

腦疽

薛立齋治一男子患腦疽其頭數多痛不可忍先服黃連消
毒散不應更以忍冬酒服之卽酣睡覺而勢去六七再四
劑而消又一男子所患尤甚亦令服之腫痛頓退但不能
平加以黃耆當歸瓜蒌白芷甘草節桔梗數劑而愈

舉人潘光甫年四十患腦疽焮腫診其脈沉靜謂陽症陰脈
斷不起已而果然蓋瘡瘍之症雖屬心火尤當分表裏虛
實果元氣充實內有實火者寒劑或可責效若寒涼過度
使胃寒脾弱陽變陰或結而不潰潰而不斂陰陽乖戾水

火交爭死無日矣

一老婦患腦疽，稟壯實，潰而痛不止，脈實便秘，與清涼飲二劑而痛止，更以消毒託裏藥而愈。

一老人患此症，色赤腫痛，脈數而有力，與黃連消毒散二劑，少愈，更以清心蓮子飲四劑而愈。

一男子患此症，腫痛脈數，以黃連消毒散二劑少退，以仙方活命飲二劑而止，更以芎歸白芍銀花知柏而潰，又以託裏藥而愈。

一男子頭頂俱腫，雖大潰腫痛益甚，兼作瀉，煩躁不睡，飲食少思，其勢可畏，診其脈毒尚在，與仙方活命飲二劑，腫痛

退半。與二神丸及六君子湯加五味麥冬棗仁。四劑諸症少退。飲食少進。睡亦少得。又與耆苓白朮散數服。飲食少進。又與十全大補湯加銀花白芷桔梗。月餘而瘥。

一老人面赤腫痛。脈數而有方。與黃連消毒散二劑少退。更與清心蓮子飲四劑而消。

一婦人患此症。膿熟不潰。脹痛欲嘔。飲食少思。急針之。與託裏藥而愈。又一婦人患之。不甚痛。不作膿。以託裏消毒散。膿成針之。補以託裏藥而愈。

一老人患此症。膿清兼作渴。脈軟而澁。以爲氣血俱虛。用八珍湯加黃耆五味子。彼不信。乃服降火之劑。果反作嘔。少

食始信服香砂六君子湯四劑嘔止食進仍投前湯四劑而愈

一男子患此症膿成未潰兼作渴尺脈大而無力以四物湯加知柏麥冬黃耆四劑而渴減又與加味八味丸渴止瘡潰更用託裏藥兼前丸而愈

一男子患此症腫痛脈數以荆防敗毒散二劑而痛止更以託裏消毒藥而消

一男子患此症焮腫疼痛發熱飲冷脈洪數與涼膈散二劑而止以金銀花四劑散而潰更以託裏藥而愈

一老婦患此症稟實潰而痛不止脈實便祕服清涼飲二劑

而止更以託裏消毒藥而愈

一男子患此症腫硬不作膿惟瘡口出水痛甚以仙方活命飲二劑痛止而膿成針之更以託裏藥而愈常見膿清而補不應及不痛或不悶堅硬者俱不治

一男子患此症膿將成微痛兼渴尺脈大而無力此陰虛火動之症彼謂心經熱毒自服清涼降火藥愈熾復求治乃以四物湯加知柏五味麥冬黃耆及加減八味丸渴止瘡潰更以託裏藥兼前丸而愈中藏經云癰疽瘡腫之作皆五臟六腑畜毒不流非獨榮衛壅塞而發其行也有處其主也有歸假令發于喉舌者心之毒皮毛者肺之毒肌肉

者脾之毒骨髓者腎之毒發于下者陰中之毒發于上者
陽中之毒外者六腑之毒內者五臟之毒故內曰壞外曰
潰上曰從下曰逆發于上者得之速發于下者得之緩感
于六腑者易治感于五臟者則難治也觀此則疽發于腦
者乃膀胱腎脈陰氣不足陽火熾盛而出也豈可揣泥于
火而不滋益陰氣耶

一男子耳後漫腫作痛肉色不變脈微數以小柴胡湯加芎
歸桔梗四劑腫少起更以託裏消毒散數劑脈滑數此膿
已成矣宜針之彼畏而不肯用因痛極始針之出膿碗許
以託裏藥兩月餘始愈凡瘡不起者託而起之不成膿者

補而成之使不內攻膿成而及時針之不數日卽愈矣當
見患者皆畏針痛而不肯用又有恐傷良肉而不肯用殊
不知瘡雖發于肉薄之所若膿成其腫亦高寸餘瘡皮又
厚分許用針深不過二分若發于背腫高必有三四寸入
針止寸許况患處肉已壞矣何痛之有何傷之慮怯弱之
人又患附骨疽待膿自通以致大潰不能收斂氣血瀝盡
而亡者多矣。用針之法

一男子素不愼起居飲食腦忽癩赤腫痛尺脈洪數以黃連
消毒散二帖濕熱頓退惟腫硬作痛以仙方活命飲二帖
腫痛悉退但痛頭不消投十宣去桂加銀花藁本白木茯

芥陳皮以託裏排膿。彼欲全消。白製黃連消毒散二帖。反
腫硬不作膿。始悟仍用十宣。加白朮茯苓半夏。腫少退。乃
去桂。又四劑而膿成。膿勢亦退。繼以八珍散。加黃耆五味
麥冬。月餘膿潰而愈。夫苦寒之藥。雖治陽症。尤當分表裏。
虛實次第時宜。豈可始末悉用之。然焮腫赤痛。尺脈數。按
之則濡。乃膀胱溼熱壅盛也。故用黃連消毒散。以解毒除
溼。腫硬作痛。乃氣血凝滯不行而作也。遂用仙方活命飲。
以散結消毒。破血。其瘡頭不消。蓋因熱毒薰蒸。氣血凝滯。
而然也。宜用甘溫之劑。補益陽氣。託裏以腐之。況此症原
屬督脈經陰。虛火盛而出。若不審其因。專用苦寒之劑。使

胃氣弱。何以腐化收斂。幾何不致于敗耶。凡瘡之易消散。易腐潰。易收斂。皆氣血壯盛故也。

汪太常太夫人年逾八十。腦疽已潰。發背繼生。頭如粟許。脈大無力。此膀胱經溼熱所致。夫脈無力。乃血氣衰也。遂以託裏消毒藥數服。稍可。更加參耆之劑。雖起而作渴。此氣血虛甚。以人參黃耆各一兩。當歸熟地各五錢。麥冬五味各一錢。數服渴止。而不潰。以前藥加肉桂十餘劑。膿成針之。瘀肉漸腐。徐徐取去。而膿猶清不斂。投以大劑十全大補湯。加白斂貝母遠志三十餘劑。膿稠而愈。凡患者氣質素實。或有痰。不服補劑。不知膿血出多。氣血並虛。豈不宜

補膏治瘡陰用參耆大補之劑陽用敗毒之方與服之而不中滿瘡亦有效。虛甚者尙加薑桂及附子也。

一男子患腦疽腫高作痛。腫處敷藥痛雖止而色變黯腫外作痛仍敷之。肉色亦黯。喉肉不痛不腫。此爲涼藥所誤。及盡頸敷之。其頸皆潰而死。

朱丹溪治元杜清碧學道武夷至婺源病腦疽自治不愈。朱往視之曰。何不服防風通聖散。清碧曰。服數次矣。朱曰。盍以酒製之。清碧乃悟。服不盡劑而愈。自此心服丹溪。

續醫說

寶材治一人病腦疽六日危篤不進飲食。寶曰。年高腎虛邪氣滯經也。令服救生湯。卽刻減半。夜間再進一服。全安。

一老婦腦後作痛筋拘急竇曰此欲發腦疽也急服救生湯
三服全愈

鬢疽

薛立齋治一男子患鬢疽。焮腫作痛發熱。以小柴胡湯加連翹金銀花桔梗四劑而消。

一男子因怒後鬢際腫痛發熱。以小柴胡湯加連翹銀花花粉桔梗四劑根畔俱消。惟瘡頭作痛。以仙方活命飲二劑痛止膿成針之。更以託裏消毒藥而愈。

一男子頭面焮腫作痛。時仲冬脈弦緊。以託裏溫經湯汗之。

而愈。

一男子患此症腫痛寒熱拘急脈浮數以荆防敗毒散二劑表症悉退更以託裏消毒散潰之而安。

一男子患此症膿熟不潰脹痛針之而止更以託裏消毒散而愈凡瘡膿熟不潰屬氣血虛也若不託裏必致難瘥

一男子患此症作膿焮痛發嘔少食以仙方活命飲一劑而止以六君子湯加當歸桔梗角刺潰而愈

一男子患此症膿清不斂以託裏散加乳香麥冬而斂

一老人患此症腫痛發熱膿清作渴脈輒而濇此血氣俱虛也欲補之彼見作渴發熱乃服降火之劑果作嘔少食復

求治。投六君子湯四劑。嘔止食進。仍用補藥月餘而愈。夫患者臟腑血氣上下各有虛實。況陰症似陽。陽症似陰。豈可以發熱止渴而概用寒涼之劑。常治患者。正氣虛邪氣實。以託裏爲主。消毒佐之。正氣實邪氣虛。以攻毒爲主。託裏佐之。正氣虛邪氣實。而專用攻毒。則先損胃氣。宜先用仙方活命飲。託裏消毒散。或用灸法。俟邪氣退。正氣復。再酌量治之。大抵正氣奪則虛。邪氣勝則實。蓋邪正不並立。一勝則一負。其虛不待損而自虛矣。若發背腦疽疔毒及患在四肢。必用灸法。拔引鬱毒。以行瘀滯。尤不可專于攻毒。診其脈而辨之。庶不有誤。

一男子患此症腫焮痛甚發寒熱服十宣散愈熾診之脈數而實此表裏俱有邪也以荆防敗毒散加芩連大黃二劑少愈更以荆防敗毒散四劑而消大抵瘡瘍之症腫焮痛甚寒熱往來或大便秘結小便淋漓心神潰悶恍惚不寐皆邪熱之實也豈可補哉東垣云瘡疽之法其受之有內外之別治之有寒溫之異受之外者法當託裏以溫劑反用寒劑則是皮毛始受之邪引入骨髓受之內者法當疏利以寒劑反用溫劑託裏則是骨髓之病上徹皮毛表裏通潰共爲一瘡助邪爲毒苦楚百倍輕則危殆重則死矣趙宜人年逾七十患鬢疽已潰焮腫痛甚喜冷脈實大便秘

澁東垣云煩躁飲冷身熱脈大精神昏悶者皆臟腑之實也遂以清涼飲一劑腫痛悉退更以託裏消毒藥三十餘劑而平若謂年高潰後投以補劑實實之禍不免矣

維陽俞黃門年逾三十冬月鬢患毒腫焮煩躁便秘脈實此膽經風熱壅上而然也馬氏云瘡瘍之症熱壅而不利者大黃湯下之遂以一劑便通瘡退更以荆防散敗毒散二劑再以十宣散去桂加花粉銀花數劑而愈大宗伯羅公耳後髮際患此焮痛脈緊數以小柴胡湯加桔梗牛蒡銀花四劑而愈

頤疽

薛立齋治高舉人年逾三十夏月熱病後患頤毒積日不消氣息奄奄脈診如無飲食少思大便不禁脈經云脈息如無似有細而微者陽氣衰也齊氏云飲食不入大便滑利腸胃虛也遂以六君子湯加炮薑肉豆寇破故紙數劑瀉止食稍進更加以黃耆當歸肉桂瀉而稠水清稀就于前藥每服加熟附子一錢數劑食進膿亦漸稠再以十全大補湯用酒芍加白斂月餘而痊。

項癰

薛立齋治一守施希祿患項毒膿已成因畏針焮延至胸色赤如霞其脈滑數飲食不進月餘不寐肢體甚倦此氣血虛而不能潰也乃針之膿出卽睡覺而思食用託裏藥兩月而愈劉璽素虛患此不針潰透頰頰氣血愈虛竟不救一婦人項患癰焮痛發寒熱以荆防敗毒散二劑少愈以小柴胡湯加連翹牛蒡桔梗四劑而消

一男子項患毒潰而作痛以參耆地黃芩歸補之而止更以八珍湯加黃耆桔梗三十餘劑而愈

馬元儀治沈氏婦頸項間患瘍痛甚躁煩發熱晝夜不眠多方不愈診之兩脈浮大沈小此陽明氣血交虧之候也陽明之氣一日一夜五十周于身而血隨之氣虛血澁則病生焉况所現皆血虛氣衰之症較之熱毒有餘者殊矣用黃耆一兩當歸五錢人參三錢炙草七分紅花五分調補氣血四劑而安。

張子和在西華寄食子夏官人宅忽項上病一病狀如白瘡瘡腫根紅硬以其微小不慮也忽故人見邀以羊羔酒飲雞魚醢蒜皆在焉張以故人不能辭又忘禁忌是夜瘡大痛不可忍項腫及頭開口發狂言目見鬼神夏君甚懼欲

報其家。張笑曰。請無慮。來日當平。乃以酒調通經散六七錢。下舟車丸百餘粒。次以熱麵羹投之。上涌下泄。一時齊作。各去牛蓋。明日日中瘡腫已平。一二日膿出而愈。

朱丹溪治王姑丈七十餘。患項疽。脈實而稍大。此因憂悶而生。太陽經。治之。歸頭二錢。黃柏一錢五分。黃耆羌活地黃酒芩桔梗各一錢。酒連連翹防風生甘草人參陳皮防己澤瀉各五分。白水煎服。

柴嶼青治夏同司鑲黃旗覺羅諱瑪德。患對口。人皆謂之落頭疽。難治。柴以爲無害。服藥五十日而愈。後某公亦患前症。亦服藥五十日而安。

姚應鳳診一人項生瘡求治應鳳曰是天蛇頭瘡宿因也三
年頭當自落而斃竟如其言

仁和縣志

肩癰

薛立齋治一男子肩患毒痲痛飲冷煩躁便秘脈數而實以
清涼飲二劑少愈以金銀花散四帖悉退又以十宣散去
桂加天花粉銀花數帖瘡潰而痊此脈與症皆有餘也

一婦人癸卯冬失物發怒缺盆內微腫甲辰春大如覆碗左
肩胛亦腫肉色如故或針出鮮血三椀許腹痛如錐泄瀉
不止四肢逆冷嘔吐惡寒或時發熱絕食已七日矣其脈

洪大時或微細。此陽氣脫陷也。用六君加炮薑三錢。附子二錢。早服。至午不應。再劑。加附子五錢。熟睡覺來。諸症頓退。六七少進稀粥。再四劑。諸症悉退。飲食如故。缺盆始痛。針出清膿二椀許。諸症復至此。虛極也。以十全大補加薑桂附各一錢。三劑而安。後減薑桂附各五分。與歸脾湯兼服。五十餘劑而愈。

上舍陳履學之內。先從左肩下一點寒。三日後右肩下發一白瘡。腫如甌盂。紅如酒盞。自用消解涼藥一劑不散。次投十宣散四劑。加痛畧紅。次連投參耆丁桂防芷之劑。膿潰。後惡心嘔吐。頭暈不止。厥逆寒戰。鼓牙虛汗。頂平。膿清。此

投解散涼劑之悞。急洗去圍藥。投以參耆歸朮地黃薑附
大劑一服。原從左肩下蓄寒一點先熱起。又進一服。遍腫
浮熱。腫高膿稠。兼絳烏金膏數日。出腐筋如脂膜。大小數
片。日進前藥二服。參耆投至八錢。踰兩月始安。愈後時以
勞厥。卽投參耆歸朮薑附大劑。乃甦。

一男子肩患毒。焮痛。飲冷煩躁。便秘脈數。而實。以清涼飲二
劑少愈。以金銀花散四劑悉退。又以十宣去桂。加天花粉
金銀花數劑。瘡頭潰而痊。

一婦人肩下患毒。脈弦緊。以白芷升麻湯二劑。表症已退。更
以託裏藥潰之而愈。

一男子素弱肩患腫欲內消服涼藥反致作瀉少食以二神丸及香砂六君子湯加肉豆蔻而瀉止食進又以託裏藥而腫亦消。

一男子肩下患疽已數日漫腫微痛頭甚多皆如粟許色不變不起發此氣血虛也診其脈果然先以仙方活命飲二劑殺其大勢更以託裏藥而起發瘡頭雖潰但流血水氣血尙虛不能爲膿也彼欲服太乙錠予謂此藥止能攻毒不能託裏不信仍服之至四次飲食不進瘡色黑陷呢逆不絕胃氣虛極也不治強投溫中健脾之劑不應而死

一男子肩患毒腫硬作痛惡症迭見用白礬末三錢糊丸以

葱頭七莖煎湯調下。腫痛悉退。再服諸症亦退。更以仙方
活命飲二劑。出水而消。此祕方名千金化毒湯。白礬末。葱
湯調服。因未難服。故易爲丸。一方土治瘡疽。不問腫潰。先
用此藥。三二服後。用消毒藥甚效。常治芻蕘之人。用此卽
退。不用託裏藥亦愈。蓋此熱毒爲患。血氣不虧。故也。若因
金石毒藥發疽者。尤效。蓋礬又能解金石之毒也。一方用
礬末五錢。硃砂五分。熱酒下亦效。此藥託裏固內。止瀉解
毒排膿。不動臟腑。不傷氣血。有益無損。其藥易得其功。甚
大偏僻之處。不可不知。此方或蟲犬所傷。溶化熱塗患處。
更以熱酒調服。皆效。

福泉黃吏部肩患毒發熱惡寒大渴煩躁似有餘之症其脈雖大而無力卻屬不足用當歸補血湯治之愈

王喬年逾三十肩患毒以人參敗毒散一劑更以十宣散去參桂加銀花花粉四劑而潰因怒動肝火風熱上壅頭面赤腫焮痛飲冷以荆防敗毒散加芩連薄荷二劑不應急砭患處出黑血蓋許仍以一劑勢退大半再進人參敗毒散四劑而愈夫病有表裏上下之殊治有緩急攻補之異若不砭刺毒氣結于內裏藥不能及焮腫日甚使投峻利之藥則上熱未除中寒已作必傷命矣

一上舍肩患疽脈數以槐花酒一服勢頓退再與金銀花黃

耆甘草十餘劑而平槐花治溼熱之功最爲神速。若虛寒之人不可過劑。

王洪緒治姚氏女年二十九小產月餘左肩手搭處先發一毒周尺有五半月背添一毒上下長一尺三寸上闊下尖皆白陷十日後始延治熱甚篤連服陽和湯三劑能起坐五劑自能便溺十二劑其續發者全消先發之搭手亦消刺瘡頂如碁子大不痛而潰四日收功後云背上如負一版轉舒不快以小金丹十九每日三進全愈。

臂癰

薛立齋治進士申天益臂患癱寒熱頭痛形氣虛弱此手足陽明經風熱邪之症用桔梗升麻湯二劑外邪頓散用託裏消毒散二劑腫痛頓退乃用補中益氣散湯調理形氣漸復而愈

一婦人臂患腫惡寒不作膿以十宣散六劑而潰以託裏散數劑而瘳

一婦人臂腫未成膿飲食少思遇勞作痛發熱以補中益氣湯二劑痛少止補氣血健脾胃藥而消

一婦人臂患毒腫硬咽喉壅塞四肢逆冷發寒熱以五香連

翹湯二劑頓愈以瘡科流氣散四劑而消

男子臂患癰脈弦緊有力以白芷升麻湯二劑頓退又二劑而消。

一男子臂患癰不作膿炙以豆豉餅及飲託裏藥三十餘劑而潰又月餘而瘳。

一婦人患臂癰瘡口紫陷膿清不斂彼以爲毒未盡欲服攻毒之劑謂瘡瘍之症腫起堅硬膿稠者實也腫下軟慢膿稀者虛也遂以附子餅炙之及飲十全大補湯百劑始愈西蜀彭黃門太安人臂痛數年服活絡丹二九而瘳

朱丹溪治從叔平生多慮質弱神勞年近五十忽左膊外側臙上起一小紅腫大約如粟曰慎勿輕視且先與人參大

料作湯。二、三斤爲好。彼未之信。慢進小帖。數服未解而止。
旬餘。值大風拔木。瘡上起一道紅綫。繞至背腠。直抵右脾
肋。曰必大料人參。少加川芎、陳皮、白朮等補劑與之。後與
此方。兩閱月而安。

東垣曰。尹老家素貧。己酉歲十月初寒。形志皆苦。于手陽明
大腸經分出癰。初有癩疔。其臂外皆腫痛。先腫在陽明左
右寸脈。皆短中得之。俱弦。按之洪緩有力。此癰得自八風
之變。以脈斷之。邪氣在經脈之表。其症大小便如故。飲食
如常。腹中和。口知味。知不在裏也。不惡風寒。止熱躁脈不
浮。知不在表也。表裏既和。邪氣止在經脈之中。內經曰。凝

于經絡爲瘡癰。其癰出身半已上。風從上受之。故知是八風之變爲瘡者也。宜治其寒邪。調其經絡中血氣。使無凝而已。以白芷升麻湯療之。一服而愈。炙甘草升麻桔梗白芷當歸稍生地黃生黃芩酒黃芩連翹黃芪肉桂紅花。右咬咀水酒各大盞半同煎服愈。

薛治王揮使臂腫一塊不痛不赤。惟脈軟懶食。時嘔。以六君子加藿香酒芍。嘔止食進。再以八珍湯二十餘劑。成膿刺之。又以十全大補而愈。次年傷寒。後此臂仍腫微痛。乃傷寒餘毒也。無表症。但虛弱。先用十宣散四劑。取參芪芎歸扶助元氣。防風桔梗白芷厚朴行散腫結。肉桂引經破血。

腫退三四。再以八珍湯膿潰而愈。至冬臂復作痛。因復祛風藥。反筋攣痛甚。此血虛不能養筋。筋虛不能束骨。遂以加味十全大補而愈。

一室女臂患腫潰。久不斂。寒熱交作。五心煩熱。飲食少思。月水不通。與逍遙散。八珍湯。經行瘡愈。一婦人月水不行。潮熱咳嗽。肌體日瘦。胸膈不利。頸腫一塊。日久不消。亦服前藥。熱退腫消。經行而愈。

宋某年逾三十。臂患癰潰。而不痛。膿稀脈弱。丹溪云。疽潰深而不痛者。胃氣大虛。而不知痛也。東垣云。膿水清稀。瘡口不合。氣血俱虛也。當以大補藥治。彼不聽。服消毒藥。氣血

虛甚遂不救。丹溪云：纔見腫痛，參之脈症，虛弱便與滋補氣血無虧，可保終吉。又云：潰瘍內外皆虛，宜接補為主。

王時亨年逾四十，臂患毒，焮痛作嘔，服託裏消毒藥，愈甚。以涼膈散二劑，頓退。更以四物湯加芩連，四劑而消。

王文遠臂患毒作痛，服寒涼藥，遂致食少，大便不實。以理中丸二服，更以六君子湯加砂仁、藿香治之。再以託裏藥，膿潰而愈。大凡瘡痛甚者，如稟厚有火，則宜苦寒之劑。若稟薄者，則宜補中益氣湯。加芩連之類。在下加黃柏。人肥而瘡作痛者，用荆防羌獨之類。蓋取其風能勝溼也。

方云：起臂生一疽，膿潰百日方愈。中有惡肉突起，如蠶豆大。

月餘不消。醫治不效。因閱本草得劉涓子鬼遺方用烏梅肉燒存性研敷。試之一日夜去其大半。再上一日而平。乃知世有奇方如此。遂留心搜刻諸方。始基于此方也。本草綱目

乳癰乳巖

薛立齋治一婦人因怒兩乳腫兼頭痛寒熱此肝經氣鬱症也。用人參敗毒散二劑表症已退。用小柴胡加芎歸枳殼桔梗四劑而愈。

一婦人因怒左乳作痛胸膈不利此屬肝脾氣滯以方脈流氣飲加木香青皮四劑而安。

一婦人久鬱左乳內結核如杏三月不消心脈澁脾脈大按之無方此肝脾氣血虧損以八珍加貝母遠志香附柴胡青皮桔梗五十餘劑而消。

一婦人乳內結核年餘哺熱少食此血氣不足欲用益氣養榮湯彼反服行氣之劑潰出清膿而歿又一婦乳內結核如栗亦服前藥大如覆碗堅硬如石出血水而歿又郭氏妾乃放出宮人乳內結一核如栗亦以前湯彼不信乃服瘡科流氣飲及敗毒散三年後大如覆碗堅硬如石出水不潰亦歿大抵鬱悶則脾氣阻肝氣逆則成隱核不痛不痒人多忽之最難治療若一有此宜戒七情遠厚味解鬱

結更以養氣血之藥治之庶可保全。否則不救。亦有一二載或五六載方潰下陷者。皆曰乳巖。以其形巖凸似巖穴也。最毒慎之。可保十中一二也。

一婦人乳腫而不作膿。以益氣養榮湯加香附青皮數劑而膿成。針之旬日而愈。

一婦人右乳腫發熱。怠惰嗜臥。無氣以動。至夜熱亦甚。以補中益氣湯兼逍遙治之而痊。

一男子左乳腫硬痛甚。以仙方活命飲二劑而止。更以十宣散加青皮。四劑膿成。針之而愈。若膿成未破。瘡頭有薄皮。剝起者。用代針之。劑點起皮處。以膏藥覆之。膿亦自出不

若及時針之不致大潰。如出不利。更經搜膿化毒之藥。若膿血未盡。輒用生肌之劑。反助邪氣。縱早合。必再發。不可不慎也。

一男子年踰五十。憂子不成立。左乳腫痛。左脇脹腫。肝脈弦。數而澁。先以龍薈丸二服。諸症皆退。又以小柴胡對四物。加青皮貝母。遠志數劑。而膿成。欲針之。仍以養氣血解鬱結。彼不從。乃雜用流氣敗毒之劑。致便秘發熱作渴。復請治。謂膿成不潰。陽氣虛不能鼓舞也。便秘發熱。陰血竭不能濡潤也。辭不治。果死。

一男子因怒。左乳腫痛。肝脈弦數。以復元通氣散。一服少愈。

以小柴胡湯加青皮芎歸數劑而消。復元通氣散。木香茴
香青皮甲片陳皮白芷甘草漏盧貝母各等分。每服三錢
溫酒調下。

孫文垣姪婦素有痰涎胸膈痞脹。近因乳腫大發寒熱欲成
癰。以加味神效瓜萸散二帖寒熱退而腫不消。用貝母白
芷爲臣。瓜萸爲君。赤芍當歸連翹爲佐。青皮甘草柴胡爲
使。痛稍減。腫仍不消。脈之近數。知已成膿。與內託十宣散
加銀花地丁二帖而膿潰。因腳上生瘡且有浮氣。前方去
地丁銀花。加苡仁蒼耳子調理全安。

薛立齋治王汝道室年踰三十。每怒後乳內作痛或腫。此肝

火所致。用小柴胡合四物加青皮、桔梗、香附、枳殼而愈。彼欲絕去病根。自服流氣飲。遂致朝寒暮熱。益加腫毒。此氣血被損而然。與八珍三十餘劑。喜其年壯元氣易復。愈一婦人乳內腫一塊如雞子。大勞則作痛。久而不消。服託裏藥不應。此乳勞症也。屬肝經血少所致。先與神效瓜蒌散四劑。更隔蒜炙之。腫稍退。再與八珍湯。倍加香附、夏枯草、地丁。仍間服前散。月餘而消。亦有乳疽一症。其狀腫硬木悶。雖破而不潰。腫亦不消。尤當急服此散。及隔蒜炙之。此症氣血爲七情所傷。亦勞症也。宜戒惱怒。節飲食。慎起居。否則不治。

一婦人患乳癰氣血頗實但瘡口不合百治不應與神效瓜
蔓散四劑少可更與數劑及豆豉餅炙之而愈一婦人患
此未潰亦與前藥三劑而消陳良甫曰婦人乳勞便服此
藥可杜絕病根毒已成能化膿爲水未成者則從大小便
散之

一人抱病小愈左乳復生癰繼又胸膈間結核其堅如石桂
苒半載百藥不能施已而牽掣于肩痛特甚禱于張王祠
夢神語曰但用生薑自然汁煎製香附服之可也比覺簡本
草視之二物治症相符訪醫者張祿亦云有理香附去毛
薑沖浸一宿爲末二錢米飲調纔數服瘡膿流出腫硬漸

消而愈槎菴

小乘

朱丹溪治一婦人年六十厚味鬱氣而形實多妒夏無汗而性急忽左乳結一小核大如棋子不痛自覺神思不佳不知食味經半月以人參湯調青皮甘草末入生薑汁細細呷一日夜五六次至五七日消矣此乃乳巖之始不早治隱至五年十年已後發不痛不痒必于乳下潰一竅如巖穴出膿又或五七年十年雖飲如故食如故洞見五內乃死惟不得于夫者有之婦人以夫爲天失於所天乃能生此謂之巖者以其如穴之巖呀空洞而外無所見故名曰巖患此者必經久淹延惟此婦治之早消患于未形餘者

皆死凡十餘人。又治一初嫁之婦，只以青皮甘草與之安。
一孺人但經將行而乳腫，先兩日發口乾而不渴，食少減脈。
左弦帶數，右却平。治用四物湯加陳皮白木茯苓，帶熱下
與點凡三十粒。

義二孺人平時乳內有結核不痛，忽乳邊又有一腫核，頗覺
有些痛。黃芩川芎木通陳皮各四錢，人參二錢，白芍一錢。
大腹皮三錢，炙甘草生甘草各一錢，當歸頭一錢，分二帖
煎服。

黃孺人乳腫痛，青皮石膏連翹角刺黃蘗子當歸頭木通各
一錢，生甘草三分，入好酒些少同煎飲。又別藥洗腫處。

李東垣治一婦人乳間出黑頭瘡瘡頂陷下作黑眼子其脈
弦洪按之細小升麻連翹葛根各一錢半肉桂三分黃芩
歸身甘草炙各一錢牛蒡五分黃柏二錢水煎至一盞二
服愈

立齋治一婦人患乳癰寒熱頭痛與荆防敗毒散一劑更與
蒲公英一握搗爛入酒二三盞再搗取汁熱服渣熱塗患
處而消丹溪云此草散執毒消腫核又散滯氣解金石毒
之聖藥

陳良甫云開慶間淦川嘉林曾都運恭人年已五十而病癩
癰後果不起又癸亥年僕處五羊趙經畧夫人年七十一

歲隔一二年。前左乳房上有一塊如鷲卵大。今忽然作楚
召子議藥。僕云。據孫真人云。婦人年五十以上。乳房不宜
見癰。見則不可以治矣。幸而未破。恐是氣瘤。漫以五香連
翹湯去大黃煎服。服後稍減。則已。過六七年後。每遇再腫
脹時。再合服。必消滅矣。

立齋曰。一婦人乳內結核。年餘不消。口乾倦怠。脈澁少食。此
肝脾二經血氣虧損之症。宜培養爲主。乃用草藥數帖。遂
不救。

繆仲淳治顧文學。又善內人。患左乳巖。用夏枯草。蒲公英爲
君。銀花。漏蘆爲臣。貝母。桑葉。甘菊。雄鼠糞。連翹。白芷。紫花

地丁山茨菰炙草瓜萸薔根陳皮乳香沒藥爲佐使另用
夏枯草煎濃汁丸之服筋許而消三年後右乳復患用舊
存餘藥服之亦消後以方治數人俱效廣筆記

馬銘鞠治沈氏婦患乳癰潰爛經年不見臟腑者一膜不用

鼠糞土棟樹子

經霜者佳
川棟不用

露蜂房各三錢俱煨存性各取

淨末和勻每服三錢酒下間兩日一服痛卽止不數日膿

盡收斂此方傳自江西取糖客因治祝氏喉症得之

廣筆記

張王屋錄後江孟修兄驗過乳癖方白芷一錢雄鼠糞一錢

二種晒乾爲末用好酒調服飲取一醺睡而愈

雄鼠糞
尖者是又

一神驗方用活鯽魚一個山藥一段如魚長同搗汁敷乳

上以紙蓋之立愈。廣筆記

薛治一婦人乳癰愈後發熱服養氣血藥不應與八珍湯加炮薑四劑而止仍以前湯加黃芪香附三十餘劑血氣平

復

薛立齋治一婦年逾二十稟弱乳內作痛頭疼脈浮與人參敗毒散倍加人參一劑表症悉退但飲食少思日晡微熱更以小柴胡湯合六君子湯二劑熱退食進方以託裏藥加柴胡十餘劑針出膿而愈又一婦患此症膿成畏針病勢漸盛乃強針之膿出三梳許脈數發渴以大補藥二十餘帖而愈丹溪云乳房為陽明所經乳頭為厥陰所屬厥

陰者肝也。乃女子致命之地。宗筋之所。且各有囊橐。其始
焮腫雖盛。患止於一二囊。若膿成。不針攻潰。諸囊矣。壯者
猶可弱者多。致不救。所以必針而後愈也。

錢國賓治一婦人年五十六歲。左乳患癰已七年。爛過半矣。
中間一孔如桃。時流血水。凡貼膏藥。痛反增劇。以布圈繫
護。防其摩擦。夫乳頭屬足厥陰肝。乳房屬足陽明胃。乃肝
胃二經之症。非單方不足以治。其外非峻補不足以養其
內。以形色氣味治之。用陳香櫞一個。其穰之瓣。如乳內之
房。其色先青而後黃。青屬肝。黃屬胃。其味先酸而後甘。酸
屬肝。甘屬胃。其氣香。能通肝胃之氣。煨黑止血。酒服和經。

此治其乳也。制一枚爲末。作二次服。又用酒炒黃芪二兩。益氣實表。土炒白朮二兩。山藥五兩。健脾收溼。芎歸地芍各一錢。養血水六椀。煎三椀。作四次服。調至一月痊。

論藥

入微

可爲格物之法。

王洪緒曰。凡乳巖初起。或乳中。或乳旁。生一小塊。不痛不癢。皮色不變。與瘰癧惡核相似。是乃陰寒結痰。總因悲哀憂愁。患難驚恐所致。初起以犀黃丸。每服三錢。酒送下。十服卽愈。或以陽和湯加土貝母五錢。煎服。數日可消。倘以膏藥敷貼。必至日漸腫大。內作一抽之痛。便覺難治。若遲至皮色變異。尤難挽回。勉以陽和湯與犀黃丸。早晚輪服。服

至自潰而痛者用大蟾多隻每日早晚取蟾破腹連雜以

蟾身刺孔貼患處。內服千金託裏散。人參防風黃芪官桂
白芷厚朴川芎桔梗

草甘三五日後接服犀黃丸可救十中三四潰後不痛而瘥

極者無一挽回大忌開刀開則翻花最慘萬無一生男女

皆有此症。

王洪緒治一婦乳患白疽寒熱痛甚與以陽和丸同二陳湯

煎服得睡痛息三服全愈又一婦患相同服夏枯草花粉

連翹蘇葉等藥五劑號痛不絕王曰向患白色今變紅色

難以全消矣投以前藥痛止能睡根盤收小連進數劑不

痛而潰貼陽和膏收功陽和丸方肉桂一兩麻黃五錢炮

薑炭五錢水泛爲丸

一婦兩乳皆患乳巖兩載如桂圓大因子死悲哀忽發如杯

以五通丸犀黃丸早晚輪服九日全消五通丸方廣木香

麻黃沒藥去油乳香去油五靈脂等分研末飯搗爲丸梧

子大每服五錢用川芎當歸赤芍連翹甘草煎湯送下凡

大癰生要緊穴道將發大時服此丸甚效與三黃丸間服

尤妙三黃丸熟大黃二兩乳香沒藥各一兩麝香一錢五分西牛黃三分雄黃五錢以熟大黃酒浸搗爛將各

末和入搗丸如梧子大每服五錢

男子患乳巖貼鯽魚膏兩日發大如拳色紅王令搗去膏

藥與陽和湯四劑色仍紅以陽和湯犀黃丸輪服至十六

日四圍皆消獨患頂潰用蟾投毒三日半月收功。

胸癰

薛立齋治一男子胸患癰腫高焮痛脈浮而緊以內託散煎服二劑表症悉滅以託裏消毒散四劑而消。

一男子素弱胸患癰飲食少而倦以六君子湯加芎歸黃芪膿成針之更以託裏藥而愈。

薛立齋治一男子胸患癰焮痛煩躁發熱作渴脈數而實時季冬此熱毒內畜也須舍時從症欲治以內疎黃連湯彼以時當隆寒乃雜用敗毒藥愈熾仍求治投前藥二劑後

去二次諸症悉退。以金銀花散加連翹山梔四劑出水而消。大抵症有主末。治有權宜。治其主則末自退。用其權則不拘于時。泥於守常必致病勢危甚。况慣用攻劑動損各經。故丹溪云。凡瘡發於一經。只當求責本經。不可干擾餘經。羅謙甫曰。守常者眾人之見。知變者智者之事。知常而不知變。細事因而取敗者多矣。

一男子胸患毒焮痛怕冷。脈洪數。以黃連解毒湯。二劑頓退。更以金銀花散。六劑而消。

一少婦胸膈間潰一竅。膿血與口中所咳相應而出。以參耆

當歸加退熱排膿等藥而愈。

余按此因肺痿所致原注

張都憲夫人。性剛多怒。胸前作痛。肉色不變。脈數惡寒。經云洪數之脈。應發熱而反惡寒。瘡疽之謂也。今脈洪數。則膿已成。但體豐厚。故色不變。似乎無膿。以痛極始肯用針。入數寸。膿出數椀。遂以清熱消毒藥治之而愈。設泥其色而不用針。無可救之理矣。

琇按肝脈挾胃貫膈。又曰是所生病者爲胸滿。故胸之癰疽。本由於肝也。

楊百戶胸患毒腫高。焮赤發熱。脈數大小便澁。飲食如常。齊氏曰。腫起色赤。寒熱疼痛。皮膚壯熱。頭目昏重。氣血之實也。又云大便硬。小便澁。飲食如故。腸滿膨脹。胸膈痞悶。肢

節疼痛。身熱脈大。精神昏塞。臟腑之實也。遂以黃連內疎湯二劑。諸症漸退。更以荆防敗毒散。加芩連山梔四劑。少愈。再以四物加芩連白芷桔梗甘草銀花。數劑而愈。

一男子胸腫一塊。半載不消。令明灸百壯。方潰。與大補藥不歛。復灸以附子餅而愈。

張路玉治談仲安。體肥善飲。夏患壯熱嘔逆。胸膈左畔隱痛。手不可拊。便溺澁數。舌上滑胎。食後痛嘔稠痰。漸見血水。脈來澁澁不調。與涼膈散加石斛連翹。下稠膩極多。先是醫作肺癰治。不效。張曰。肺癰必咳嗽吐腥穢痰。此但嘔不嗽。洵爲胃病無疑。下後四五日復嘔如前。再以小劑投之。

三十而勢甫平。後以保元荅橋平調二三日而痊。先時有李姓者患此專以清熱解毒為務。直至脇畔潰腐。膿水淋漓。纏綿匝月而斃。良因見機不早。悔無及矣。

琇按此症最難別白。卽內經所謂內有裏大膿血之症也。吾鄉一名醫自患此。同道診之。不知為癰也。雜進參附丁桂之劑。久之吐出臭膿。乃省已無及矣。

脇癰

薛立齋治一婦人脇患癰未成膿。惡寒脈緊。以十宣散加柴胡一劑。表症悉退。更以託裏散數劑。膿清而愈。

一男子近脇患疽腫而不潰投大補之劑潰而已愈後患弱症而沒

薛立齋治一上舍年逾四十因怒脇內作痛不止數日後外結一塊三寸許漫腫色不赤按之微痛此怒氣傷肝致血傷氣鬱爲患以小柴胡湯對四物倍用芎歸黃芩貝母肉桂治之彼謂丹溪云腫瘍內外皆癰宜託裏表散爲主又云凡瘡未破毒攻臟腑一毫熱藥斷不可用况此症爲氣血凝滯乃服流氣飲愈虛始信而復求治視之虛症併臻診之胃氣更虛彼欲服薛前藥曰急者先治遂以四君子湯加酒芍炮薑四劑少得更加當歸又四劑胃氣漸醒乃

去薑又加黃芪芎歸肉桂。數劑瘡色少赤。并微作痛。又二十餘劑。膿成針之。却與十全大補湯。喜其謹疾。又兩月餘而瘳。夫氣血凝滯。多因營衛之氣弱。不能運散。豈可復用流氣飲。以益其虛。况各經氣血多寡不同。心包絡膀胱小腸肝經。多血少氣。三焦膽腎心脾肺。少血多氣。前症正屬膽經少血之臟。人年四十以上。陰血日衰。且肝症俱屬不足。腫瘍內外皆壅。宜託裏表散為主。乃補氣血藥。而加以行散之劑。非專攻之謂也。若腫焮痛甚。煩躁脈大。辛熱之劑。不但腫瘍不可用。雖潰瘍亦不可用也。凡患者須分經絡氣血地步遠近。年歲老幼稟氣虛實。及七情所感。時令

所宜而治之常見以流氣十宣二散。概治結腫之症。以致

取敗者多矣。

此案與舊案東侍御一則正同而此之發明最爲緊要而舊案節之故重錄於此

馬元儀治沈氏婦左脇患腫瘍長五寸許治已兩月發表託

裏劑多功少診其兩脈弦數兼澁腫處低陷作痛寒熱經

行不止口燥艱食此症頗危必得之勞鬱且怒邪熱結聚

厥陰之位榮衛不行周身火邪獨徹上下表歛俱所不宜

用生首烏一兩滋其內燥柴胡一錢疎其氣血枳壳桔梗

各一錢舒通肺氣以制肝木杏仁蘇子各二錢調氣化痰

以清上焦丹皮一錢清其血半夏麴一錢和其中兩劑寒

熱減而經止患處焮腫潰稠膿飲食少進瘍醫以潰後當

行大補。投耆木之屬。復致瘡口內陷。食少。曰癰疽已潰。當補。此其常耳。今兩脈遲澁。遲則氣滯。澁則血滯。鬱而得補。其鬱彌甚。始猶肝木自傷。既乃轉戕脾胃。以不循常度。分肉不溫。經隧不行。而欲瘡之斂也。其可得乎。夫榮不通。須以血藥和之。當歸。桃仁。紅花。延胡索是也。白朮。枳殼。一補一瀉。所以推陳氣。以致新氣。乾薑煖胃。而和血。查肉消滯。而和中服。二劑。復大潰。出稠膿。碗許。食進神旺而安。

名三言至理

須細參之

朱丹溪診李兄年四十餘。而面稍白。神氣勞甚。忽脇下生一

癰腫如桃。一人教用補劑。眾笑阻之。於是流氣飲十宣散。

襍而進之旬餘召視之曰非惟不與補藥抑且多得解利血氣俱憊不可爲矣已而果然。

立齋曰一男子因怒左脇腫一塊不作痛脈澁而浮此肝經邪火熾甚而真氣不足爲患宜培養氣血爲主乃用草藥數帖遂致不救。

一男子因勞發熱脇下腫痛脈雖大而按之無力此氣血虛腠理不密邪氣襲於肉裏而然也河間云若人飲食疎精神衰氣血弱肌肉消導榮衛之氣短促而澁滯故寒薄腠理而癰腫也當補之以接虛怯之氣遂以補中益氣湯加羌活四劑少可去羌活又十餘劑而愈又一男子年二十

遍身微痛。腰間作腫痛甚。以前藥加茯苓半夏並愈。

一朝土腹脇間病疽。經歲或以地骨皮煎湯淋洗。出血一二

升。家人懼欲止之。病者曰。疽似快。更淋之。有五升許。血漸

淡乃止。以細穰貼之。次日結痂而愈。全上

張子和治襄陵馬國卿左乳二肋間期門穴中發痛硬而不

潰。痛不可忍。瘍醫皆曰乳癰。或曰紅絲漏。或曰覷心瘡。使

服內託數百日。又服五香連翹湯數月。皆無驗。張曰。此馬

刀也。足少陽膽經之病。出靈樞十二經以示之。其狀如馬

刀。故曰馬刀。堅而不潰。乃邀之於食肆中。使食浸湯餅。稍

覺緩。次日先以滄鹽上涌。又以原劑滌去熱勢。約十數行。

腫已散矣

朱葛黃家妾左脇病馬刀憎寒發痛已四五日矣張曰此足陽少陽膽經病也少血多氣堅而不潰不可急攻當以苦劑涌之以五香連翹湯託之既而痛止然瘡根未散有一道人過見之曰我有妙藥可潰而爲膿不如此何時而愈既經毒藥痛不可忍外寒內嘔血不止大便黑色飲食不下號呼悶亂幾于死再求治張曰脇間皮薄肉淺豈可輕用毒藥復令洗去以涼劑下之痛立止腫亦消

腋癰

薛立齋治一童子腋下患癰久不斂膿清脈大倦怠懶食少寐自汗口乾以內補黃芪湯及豆豉餅炙之兩月而愈凡瘡膿潰而清或瘡口不合或聚腫不赤肌肉寒冷自汗色脫者皆氣血俱虛也非補不可

一男子腋下患毒欬逆不食腸鳴切痛四肢厥冷脈細以託裏溫中湯二劑頓愈更以香砂六君子湯三神丸而飲食頓進以十全大補湯二十劑而斂

里中有周七者少年曾患毒左腋下得一異方用糯米炊飯乘熱入鹽塊夾葱管少許搗極爛如膏貼患處輒消至中年腰間忽生一毒熱如火板硬痛不可忍偃僕跣躄自

必死。屢藥不效。急思前方。如法貼之。未幾大便去糞如宿垢甚多。硬者漸軟。數日而起。

薛立齋心法治河南張承祖年逾二十。腋下患毒十餘日。腫硬不潰。脈弱時嘔。謂腫硬不潰。脈弱。乃陽氣虛。嘔吐少食。乃胃氣弱。先以六君子湯加藿香砂仁治之。彼謂腫瘍時嘔。當作毒氣攻心治之。潰瘍時嘔。當作陰虛補之。曰此丹。溪大概之言也。卽諸痛痒瘡皆屬心火之意。假如赤腫痛甚。煩躁脈實而嘔。爲有餘法。當下。不腫硬不痛不潰。脈弱而嘔。爲不足法。當補之。亦有痛傷胃氣。或感寒邪穢氣。而作嘔者。雖腫瘍尤當助胃壯氣。彼執不用。信用攻伐之藥。

病愈甚復請診其脈微細而發熱謂熱而脈靜脫血脈實汗後煩躁者皆難治後果然夫腫瘍毒氣內侵作嘔十有二潰瘍濕氣內侵作嘔十有八九豈可混爲一途

朱文鼎母因忿鬱腋下結一核二十餘年因怒加腫痛完穀不化飲食少思東垣云瀉利不止飲食不入此腸胃虛也遂以六君子湯加砂仁肉桂乾薑肉豆蔻瀉雖止而膿清瘡口不合氣血虛也以十全大補湯月餘而愈

一男子年逾五十腋下患毒瘡口不合右關脈數而渴此胃火所致用竹葉黃耆湯遂止再用補氣藥而愈嘗治午後發渴或發熱用地骨皮散亦效

胃腕癰

張隱菴曰。順治辛卯歲。予年四十有二。八月中生一胃腕癰。在鳩尾斜下右寸許。微腫不紅。按之不痛。隱隱然如一雞卵在內。姚繼元視之曰。此胃腕癰也。一名捧心癰。速宜解散。否則有性命之憂。與一大膏藥。上加末藥二三錢。中間烘貼。至暮手足蘇軟。漸至身不能轉。側仰臥于書齋。心煩意亂。屏去家人。至初更時。癰上起一毒氣。從左乳下至肋下。脇入于左腎。入時如燒錐刺入眼中。一陣火光。大如車輪。神氣昏暈。痛楚難言。火光漸搖漾而散。神昏始蘇。過半

時許其氣復起。其行如舊痛楚如前。如此者三四次。予思此戊與癸合也。腑邪入臟。目分必死。忘想此毒氣不從脇下入腎得從中而入於腸胃則生矣。如此靜而行之。初次不從二次。卽隨想而仍從左乳下入于腸中腹中大鳴。無復前痛楚矣。隨起隨想。因悟修養之道。氣隨想而運用者也。至天明大泄數次。胸膈寬舒。繼元先生視之曰。毒已散解。無妨事矣。予問曰。膏藥乃毒藥。耶曰。上撒之末藥。名端午藥。純用砒霜巴豆。于端午日配制。無此毒藥。焉能透入皮肉之內。予曰。何不早言。昨晚以爲必死於毒。今早始悟。膏藥中必有毒藥。而得生於毒矣。毒藥攻疾。有如此之妙。

也。至次年中秋復發，仍用膏藥末藥，毫無前番之狀，腫亦不消。予因想運氣之妙，經行坐臥，以手按摩，意想此毒仍歸腸胃而出，如此十餘日而散。至次年中秋又發，予謂繼元先生曰：去歲膏藥不應，今須另法治之。姚曰：部院劉公之夫人生此疾，曾另置末藥，比前更毒，貼之要起大泡，此藥用之無有不驗，貼之數日並不起泡，腫亦不消。予想此症已頑，不受毒藥之制，卽揭去膏藥，用大艾圓迎頭灸九壯，其毒隨火氣四散，嗣後永不發矣。予想陽明之毒，准在中秋金旺之時而發，初從毒攻而解，次隨氣運而散，後因勝制而消，因悟氣運制化之道，有如此之妙，用五行合化

之理人與天地相參卽以此理推治百病。奇妙異常。王紹隆先生曰。業醫人須病病經過始得之矣。

王洪緒曰。并泉疽生於心口。又名慢心銳毒。初起。心口內有塊漸大。心口發高。毒陷卽死。此醫家縮手之症。諸書亦無治法。惟余家秘集。載以本人兩手十指。以線量以長短。共積其線。在喉管正中處。雙環至背脊之中。看兩線頭盡處爲中穴。又以本人之中指中一節。用柴心量。准作一寸。中穴之左右各遠一寸。各以墨記。分立三穴。如品字狀。每穴用艾灸三大壯。齊火灸。灸則全愈。